

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsiobasotho.co.ls

Lekala le'a
iikinola



3


Marena a
tšehetsa Motlotlehi

6



BESP e
tlosa bana
malapeng

8



HO ROBALA KE HO FETOHA

5

www.moeletsiobasotho.co.ls



KETEKELO EA LILEMO TSE MAKHOLO A
MABELI SECHABA SA BASOTHO SE THEILOE

+266 28 350 466/
+266 6260 09 WhatsApp
newsroom@moeletsiobasotho.co.ls

#PARARE DOMINO PLEBEM PERFECTAM

MOELETSI

CBL le NUL thupelong ea lichelete

Le batla le be le jesoe?

Nakong ena eo re phelang ho eona ea tsoelopele e kenyelelitseng marang-rang ho bebofatsa bophelo e fetotse batho lintho tse batlang ho luloa li etsetsoa ntho e 'ngoe le e 'ngoe. Qetelong motho o tlo tseka hore a jesoe ka le reng ke tokelo ea hae ho phela ka boiketlo. Kamehla sechaba se rata ho sola moloko ona oa morao o hlahileng ka 2000 hore o botsoa ebile o likhoba li ngata, se makatsang ke hore le baholo ba bona ba se ba tsamaea mehlaleng ea bana ba bona.

Hohle mona Basotho ba lla ka hore 'muso ha o thehele batho mesebetsi o shebile ho khotsafatsa lithahasello tsa bapolotiki ba pusong. Ke oo o etsa lifato-fato metseng le metsaneng, ebe batho ba lla ka hore ha ba fuoe lisebelisoa ho phethela mesebetsi. Baokameli ha ba kopa basebetsi ho tla le thepa malapeng a bona ba hana ka le reng ke ea boleng bo holimo. Ruri ke 'nete hore motho a ka lahla gauta e ka letsohong la hae a shebile sente e ka mokotleng oa e mong. Athe fato-fato ee e tlo thusa mang, 'Muso? Kamora ho phethela mesebetsi oo ke bo-mang ba tlo una molemo 'me ba itoatsa melomo? Mathata ona a teng lefatšeng empa le rona re iphetola ona.

Motlotlehi Letsie III o fuoe thomo ea ho bona hore phepo e nepahetseng ea phethahala kahar'a sechaba, ka hona Marena a Sehlooho a sa tsoa etsetsoa thupelo hore le bona ba kenyeletsoho litabeng tsa phepo e ntle. Ka ketso ena ba tla tsamaea mehlaleng ea Motlotlehi 'me ba fele ba mo thuse ho phetha thomo joalokaha e le matona a hae. Maren'a ka le hoja le fuoa thomo nakong eo tlala le bofuma li aparetseng naha ea Lesotho, mohale o tsoa maroleng ka hona le fuoe thomo ena hobane ho se tika-tiko hore le tla e phetha ka makhethe. Morena Molimo a le sitse ka bohale ba Morena Salomone ho phethahatsa tsohle tse behiloeng boliseng ba lona.

Ho na le bacha ba ntseng ba tsoelapele ho ipabola lipapaling ka ho fapakana, 'me re bone mafelong a beke meketjaneng ea ho fana ka likhau. Ho qala papaling ea bolo ea maoto ea basali le ea banna le papaling ea chess. Le hoja lipapali kahar'a naha ka mona li sa thuse batho ho iphelisa hakaalo empa ho bohlokoa haholo ho bacha ho ikakhela ka setotsoana ho tsona. Sena se tla ba thusa ho chorisa likelello tsa bona, ho li phomotsa le ho li thapolla kamor'a boinahano holima litaba tsa bophelo kapa tsa lithuto. Ka hona hore le hoja ba se na ho fumana mokhoa oa ho iphelisa hakaalo, ba fumana molemo o fetisisang ho feta tsohle e leng bophelo bo botle ba kelello. Le se khathale matla ke hona hobane moputso o mongata lipapaling.

Teboho e kholo Lekaleng la Tekano, Bacha le Ntšetsopele ea Sechaba ka tšebeliso 'moho le Lekala la Thuto le Koetliso ho tsoelapele ho thusa bana bohle ba neng ba lutse malapeng hobane batsoali ba se na mokhoa oa ho ba kenya sekolo. Sena se pakahatsa polelo ea Sesotho e reng ngoana o holisoa ke motse, etsoe thuto le eona e le pitsa e maoto a mararo.



Tšeliso Thakholi

Banka e Kholo ea Lesotho(CBL) ka kopanelo le Sekolo se Seholo sa Sechaba(NUL), li thakhotse thupelo ea letsatsi le ba nang le kobo ea bohali ka morero oa ho tšohla lenane-thuto le lecha la litaba tsa tšebeliso le taolo ea lichelete. Thupelo ena e ne e tšoaretsoe Lehakoe, Maseru ka la 9 Phupu monongoaha.

H'a bula ka molao thupelo ena, motlatsi oa Mookameli oa CBL, Monghali Lehlolela Mohapi o boletse hore boithuto boo ba ileng ba bo etsa ka selemo sa 2016 ho isa ho 2017 bo sibolotse hore karolo e kholo ea sechaba e kenyeletsang har'a ba bang bahlanka

ba 'muso, li tsa tšireletso, litichere le Basotho ka kakaretso ba alima lichelete litsing tsa lichelete tse batlang litsoala tse holimo. E be hamorao ha ba kopana le liqholotso tsa litsoala tse holimo tseo ba seng ba sitoa ho li lefa, ba isa litletlebo ho CBL hore e ba namolele.

A re ke ka hona ba ileng ba bona ho le bohlokoa hore ba kopane 'moho le NUL, ho thusa sechaba sa Basotho ho se ntša kahare ho tebe-tebe eo ba leng kahara eona ea mekoloto e boima, ka ho rala lenane-thuto lena la tšebeliso ea lichelete, leo ba tlang ho ba koetlisong ba tla rupeloa nako ea likhoeli tse tšeletseng. A qetella ka hore tebello ke hore le qale isao.

Mookameli Lefapheng

la Lithuto tsa Mahlale, Prof. Peter Khaola o boletse hore setlamo sa bona le CBL, se tlele nakong e nepahetseng kaha se tliil'o pholosa sechaba sa Basotho se khasang kahara mekoloto e boima, ho se beha leseling ka tšebeliso le taolo ea lichelete. A supa hore NUL e ikemiselitse ho sebetsa le mafapha ohle a sechaba, a 'muso le a ikemetseng ho arabela litlhoko tsa sechaba litabeng tsa lichelete. A bontša hore Mosotho ka mong o lokela ho tseba ka tšebeliso ea lichelete.

Thupelo ena eo e leng ea pele ea mofuta oa eona, e kenetsoe ke baokameli ba makala a fapakaneng, bahiri le baokameli ba mafapha a sechaba.



Lekala le'a ikinola

Nthabeleng Seithleko

Lekala la Bacha le Ntšetsopele ea Sechaba le koetse ka molao litefiso tsa litsiane ka letsoho, Kanseleng ea Metsi-Maholo Mafeteng, e le karolo ea ho khahlametsa sechaba le ho qoba litšenyehelo nakong eo batho ba fumantšoaang litsiane. Tsena li bile ka la 8 Phupu monongoaha.

Nkhono 'Makarabo Makhakhe oa Ha Mahosi, o hlalositse hore o fumana litsiane tsena khoeli le khoeli, 'me h'a ikisitse setsing o atleha ho reka litlhoko tsa hae ha bobebe. O re ka nako tse ling o roma motho ea mo khollang empa a se fumane litsiane tsa hae li felletse kaha a lokela ho mo lefa.

O re o sebelisa mohala oa thekeng ho arabela melaetsa ha motho a bua le eena kaha a sa tsebe ho bala. O re ha ba t'l'o kholisoa ka marang-rang a M-Pesa le Eco-Cash, ho t'l'o etsa hore bophelo ba hae bo be tsietsing hobane o tlo tlameha ho kopa thuso ho batho ba bang haholo nakong eo a nts'ang chelete. O re le ho tseba hore chelete e kene ho tlo ba boima hobane ha tsebe ho sheba molaetsa le



bana b'a mo qhekanyetsa. A ipiletsa ho lekala ho tsoelapele ho ba kholisa ka tselo e esaleng ba thusa ka eona, ho baleha mathata a kang ana.

Nkhono 'Masello Botsane oa Ha Maine, o supile hore bana b'a ba utsoetsa le ho ba qhekanyetsa ka litsiane tsa bona, ka hona ha e le mona lintho li fetohile ho t'l'o ba thata hobane leha melaetsa e kene mehaleng ka nako tse ling ha ba e bone, hoo ho fa bana ba nang le litsebo ho ikhapela litsiane tsa bona.

Potsong ea hore na ba

ile ba fumantšoa likoetliso ka litaba tsa ho lefshoa ka marang-rang? O itse ba ne ba lula ba bolelloa empa ba sitoa ho amohela taba ena, kaha ho boloka linomoro tsa lekunutu e le qholotso e kholo ho bona.

E mong oa baitšokuli ba rekisetsang sebakeng sena nakong eo ho kholisoang bo-nkhono le bo-ntate mohlolo 'Mamasupha Mahooana, o supile hore taba ena e t'l'o mo ama kaha a sa tsebe o t'l'o ja eng. O itse o na le lilemo tse 21 a phelisa bana ba hae ka ho rekisa, 'me o ntse a e-na le ngoana ea et-

sang sehlopha sa ho qetela sekolong, ea hlokang ho thusoa.

H'a phethela o itse 'muso o ba shebe ka leihlo la mohau, ba tlohele tšebeliso ea marang-rang kaha e t'l'o ama likhoebotse bona kaha ba khotaletsa ho kena khoebong.

Ofisiri ea Lekaleng la Bacha le Ntšetsopele ea Sechaba Mafeteng, Mpho Mohlomi, o supile hore ba kentse mokhoa ona o mocha tšebetsong, kamor'a ho hlokomela hore batho ba bang ba tloha libakeng tse hole haholo, ba qetelle ba sa at-

lehe ho fumana litsiane ka letsatsi le boletsoeng e be e ba chelete e oeleletseng. A bontša ha ba bang ba sitoa ho fihla moo ho kholloang ka lebaka la bokuli.

O re ba qalile tšebetso ena, kanseleng ea Mamantšō Motsekuoa, Qibing, Tšanatalana, Ha Ralintši, Ha Ramohapi, Makoabating, Thabana-Morena le Metsi-Maholo. O itse esale ba qala mosebetsi ona liqholotso ke hore ho na le ho fosahala ha nomoro e tšelloang chelete, ha batho ba bang ba sa ngolisa ka nako.

A bontša ba fihletse likatleho tse 'maloa tse kenyelletsang phokotso ea mosebetsi o mongata e le lekala oa ho pota-pota litsing ba kholisa batho. Ka hona o re ha joale ba t'l'o sebetsana le litletlebo eseng mela e melele ea batho ba kholang, hape e ba fokolelitse maeto a matelele le chelete e neng e sebelisoa ho nka maeto ao.

H'a phethela, o itse pele ba kenya morero ona tšebetsong ba ile ba fana ka lithupelo tse 'maloa le ho tsebisa bohle ba fumanang litsiane ka phetoho ena. A re boikemisetso ba bona ke ho thusa hore batho bohle ba fumane litsiane ha bonolo.

Lesupa-tsela le thabisa Basotho

Nthabeleng Seithleko

Baahi ba metse e fapaneng ea Mafeteng ba sebetsang morerong oa Lesupa-tsela (fato-fato) ba re 'muso o ba file mosebetsi ntle le lisebelisoa, 'me hoo ho liehisa tšebetso ea bona. Tsena li hlaleletse puisanong le Koranta ka la 9 Phupu monongoaha.

Maikutlong a bona ba bontšitse tlhokahalo ea lisebelisoa e le qholotso e kholo hobane le malapeng a bona ba ntse ba se na tsona, joaloka likiribae, lipeke le likharafu, ka hona ba sitoa ho khatha tema e bonahalang.

E mong oa batho ba sebetsang fato-fatong ena, Teboho Namane oa Ha Letšoara, o itse ba sebetsa

habohloko ke tlhokahalo ea lisebelisoa hobane ba thota mobu ka lisara-sara.

O re tšebetso ena e qalile ka la 1 Phupu monongoaha 'me e tla fihla pheletsong ka la 26 Phupu monongoaha. O itse chelete e kaalo ka M1, 300.00 e fuoang motho ka mong e t'l'o mo thusa haholo hobane o a phela ka ho hlaolela batho masimo le ho itšokola. A re ba thoholetsa 'muso ka ho ba hopola ka hona e se eka mosebetsi ea mofuta ona e ke ke ea fela molemong oa tsoelopele ea bophelo ba bona hobane ba thatafaletsoe hobane ha ho mosebetsi sebakeng sa boipheliso.

'Marelebohile Ralikane oa Ha Theko, o bontšitse a thabetse mosebetsi ona ka le reng o t'l'o lopolla lelapa

la hae tlang ea boja-likata. O re ha na molekane o phela le bana ba bararo ba kenang sekolo 'me ho ba fepa ho boima kaha ho se mosebetsi. A bontša a rekela bana lijo ka chelete eo a e fumang ha rekisitse joala ba Sesotho.

Le eena ka mokhoa o tšoanang o thoholelitse 'muso ka ho ba ela hloko e le batho ba phelang metseng e hole, kaha nako eohle ho hopoloa batho ba literopong.

Mookameli Morerong ona 'Malehloa Makosholo, o bontšitse qholotso e kholo e liehisang mosebetsi oa bona e le tlhokahalo ea lisebelisoa, hoo ba kopang batho ho tla le tsa bona malapeng.

A re ba ile ba bolelloa ke ba 'muso hore ba tla lokela ho sebelisa thepa ea

bona le hoja ba ile ba sitoa ho topa hantle ka karabo ea litaba tsena. O re ho bohlokoa hore ha ho etsoa lintlafatso ho eloe hloko lisebelisoa tsa sechaba hore mosebetsi o tsamae ha bonolo.

A re mosebetsi e tšoanang le ena e ntse e-na le khahlamelo ea lipolotiki e leng se nyahamisang batho bao e seng litho tsa mekha le makhotla a lipolotiki, kapa ba sa ikamahanyeng le tsona. O re mosebetsi ona o t'l'o arabela litlhoko tsa sechaba joaloka ho hlola tlala e tjametseng malapa a mangata haholo nakong ena eo batho ba sa sebetseng.

A re tsela e lokisoang ha lipula li na ha e tsamae, 'me o lumela hore ka tšebetso eo ba ntseng ba e etsa ho tla ba le phe-

toho 'me ba tla nolofalloa ke ho nka maeto ka linako tsohle.

H'a phethela, o itse maikutlo ke hore fato-fato e lule e ba teng hobane e arabela litlhoko tsa sechaba leha 'muso o ba qhalletse matsoho ka lisebelisoa.

Letona Ofising ea Tona-Kholo Mohlomphehi Liphopho Tau, o supile hore morero ona o reretsoe ho thusa sechaba ho iketsetsa lintlafatso metseng joaloka tukiso ea litsela le ho thibela khoholeho ea mobu. A re ba ile ba bolella bohle hore ba tsebe ba ka sebelisa lithupa tsa bona ho atlehisa mosebetsi. O itse ba rata ho bona Basotho ba e-na le seo ba se jang eseng ba robala ba itsosa, ka hona a bontša morero ona o anetse naha ka bophara.

RE TŠEHETSA BACHA



eo re e sebelisang e kang masela, mabenyanane le lipalesa tse khabisang le thepa e kang ea lijana, litheko tsa tsona li boima haholo kaha tsena tsohle re li fumana kantle ho naha.

Likatlheho ke life?

Kannete ha li e-s'oa be ngata haholo hoba re na le bacha, empa re atleha ho beha bohobe tafoleng, ha ho tsoane le pele ha re ne re se na letho.

Na ho na le batho ba le tšehetselitseng?

Hajoale ho na le likampani tse peli tse re tšehelitseng bakeng sa ho re thusa ho fumana thepa ka mokhoa o bobebe. Ba re latela eona ho bahlahisi e be re e reka ho bona ka litheko tse tlase haholo. Ba re kopile hore re se hlalise mabitso a likampani tsa bona.

U ka rata ho re'ng ho bacha?

Ke ba kopa hore ba ikopanye ka litsebo tsa bona tse fapakaneng, metseng le metsaneng moo ba phelang teng. Ba ithehele mesebetsi ea boipheliso ho latela litsebo tsa bona tse fapakaneng. E kholo ka ho fetisisa e be batho ba nang le lerato la khoebo. Ba be le mamello le tiisetso hoba khoebo ha se potele e khoathoang ka lehlaka.

Tšelisano Thakholi

Lipalesa Ramokhele le Lisemelo Tikiso ba Ha Thetsane Seterekeng sa Maseru, ba ikopantse ho ithehela khoebo e bitsoang Beauti Collexion & Deco e khabisang meketeng e fapakaneng e kang ea manyalo, boithabiso, mafu le e meholo e kang ea 'muso. Ntle ho mona, ba boetse ba iphelisa ka thekiso ea lijana. Bobeli bona bo ikopantse kamor'a ho ela hloko hore bacha ba Naha ea Lesotho ba tjametsoe ke tlhokahalo e kholo ea mesebetsi. Morero oa bona ke ho loantšha tlhokahalo ea mesebetsi. E mong oa bathehi ba khoebo ena Lipalesa Ramokhele o re qoqela ka tsa khoebo ena ea bona.

Ak'u re qhatsetse hore na u qalile ka ho etsa'ng bophelong ba hau?

Haesale ke le motho ea ratang khoebo hobane lapeng heso ke 'na ngoanana a le mong. Ke holetse kahare ho khoebo kaha batsoali ba ka haesale ba iphelisa ka khoebo ea ho loha le ho roka liphahlo ho fihlela kajeno. Che, ke se ke setse ka 'm'e fela, ntate o sa na ikele ho 'Mopi oa hae. Ha ke qeta ka Sekolong sa Lithuto tsa Matsoho le tsa Mahale

sa Limkokwing, ke ile ka ikopanya le e mong motsoalle oa ka eo re neng re kena le eena, ra theha khoebo e ntseng e le ncha ngoahola ka Pulungoana ea ho khabisa meketeng e fapakaneng.

Pele re kopana o ne a se a ntse a qalile khoebo ea ho hleka le ho rekisa lijana e bitsoang Beauti Collexion & Deco. Ra fihla ra kopanya litsebo ra etsa khoebo e le 'ngoe eo kahare ho eona re kentseng likhoebo tse peli tse sa tsoaneng, feela tse batlang li etsa lintho tse tsoanang. Ka mo kopa ho se fetole lebitso khoebong ena e ncha.

Uena u sebetsa u le'ng kahare ho khoebo?

Ke mookameli ha eena e le ea bapatsang le ho rekisetsa bareki khoebo ea rona, e le hore batho ba tsebe ka eona. 'Na mosebetsi oa ka ke ho bona hore lintho li'a etsahala ka mokhoa oo re li rerileng ka teng. Ke kopa hore u ele hloko hore tsohle re ntse re li etsa 'moho empa hona e le tsela feela eo re arotseng tšebetso ea rona, ho qoba hore re se iphumane re hatane litorong.


Na ho na le moo u ileng ua sebetsa teng pele le theha khoebo ee?

Ha ho moo ke ileng ka sebetsa empa ha ke ntse

ke le sekolong ke ne ke thusa batsoali ba ka, ho hlopha li-ordara tsa bareki ka makhetho ho li isa ho beng ba tsona, haholo-holo tsa likolo. E ne e le ona mosebetsi oa ka o moholo. Ho feta mona ke ba thusa litabeng tsa poloko ea libuka tsa khoebo.

Qholotso e kholo eo le kopanang le eona ke efe?

Qholotso e kholo ke ea hore ka nako e 'ngoe bareki ba bang ba litšebeliso tsa rona ba lieha ho re lefa, 'me sena se ama khoebo ea rona haholo. Qholotso e 'ngoe ke ea hore thepa



Matona a mehleng a thusa naha

Nthabeleng Seithleko

Letona la tsa Machabemg Mohlomphehi Lejone Mpotjoane o re lekala la habo le tšoenyehile ke bothata bo bakeloang bana ba Basotho ba tšepisoang ho fumantšoa lihlapiso ke likamphani tse itlhalosang li thusa baithuti ka lihlapiso tsa ho ea ntšetsapele lithuto tsa bona kante ho naha. Tsena li hlaheletse 'mokeng oa bo-ralitaba ka la 5 Phupu monongoaha.

O re likamphani tsena li tšepisa ho khahlametsa bana ba Basotho ka 50% ea lihlapiso empa ho se joalo, ka hona litaba tsena ha li'a nepahala hobane bana ba Basotho ba iphumana ha ba le likolong ba tlameha ho lefella tseo boholo ba bona bo hlolang ho li lefella ba sala ba eme le monna oa mateneng.

O re ketsahalo ena, e qetella e sitisa bana ho tsoa kahara naha eo, ka lebaka la mekoloto e ba behang tlokotsing. O itse Basotho ba anngoeng ke boemo bona ba qetella ba phela mapatlelong a literopo, e ba mahlatsipa a lithetefatsi le makhoba a thobalano. O re sena se latela hore baithuti ba joalo ba fumane mathata a ba sitisang ho tsoelapele ka lithuto tsa bona Naheng ea India.

Ho feta mona o bile a teka tlaleho mabapi le boemo ba Lesotho, ba ho iketela bongoli bo boholo mokhatlong oa linaha tsa selekane, 'me SADC e ntse tšepiso ea ho tšehetsa Lesotho likhethon tsena.

Ba fane ka thomo ho Morena Seeiso Bereng Seeiso, matona a mehleng a tsa machabeng, 'Matšepo Ramakoe le Mohlabi Tsekoa ho etela linaha tse hloahiloeng ho kopela Lesotho tšehetso le ho fetisa molaetsa ona ka tsela e matla.

O re mosebetsi ona ha o bonolo kaha ba loanela hore Lesotho le tle le ithome pele 'me ba lokela ho tšoara ka thata ho bona hore ba hapa setulo sena ka litsela tsohle.

Ea thonyelitsoeng boemo ba bongoli bo boholo ba Mokhatlo oa Linaha tsa Selekane Joshua Setipa, o tobokelitse hore mokhatlo ona o thusa naha ea Lesotho litabeng tsa puso le khoebo. A re e bang a ka khetheloa boemo bona o tla tseba ho batlela naha ea Lesotho lithuso tsohle le ho tiisa setsoalle le linaha tse ling, haholo ho batlela naha boramatsete le ho bona hore ba batlela bana ba Basotho menyetla ea ho fumana likolo kante ho naha.

O re o ikemiselitse ka hohle ho loanela hore melemo e mengata e tle e tle kahare ho



Naha ea Lesotho molemong oa ntlafalo le kholo ea moruo.

Letona la Mehleng la tsa Machabeng 'Matšepo Ramakoe, o supile hore thomo ena ha e bonolo hobane ba rata ho bona naha e hapile mojao ona, ka hona mosebetsi o moholo oa bona ke ho e kopela tšehetso linaheng.

O re seo a se tsebang ke hore Basotho ba na le makhabane a mangata, a tla thusa hore linaha tsa selekane li tsoelepele, haholo litsebo tsa Monghali Joshua Setipa, kaha e le motho ea sebelitseng libakeng tse 'maloa.

LDF e tsoelapele

Nthabeleng Seithleko

Tona-Khola Ntsokoane Samuel Matekane o re o tsoa barupele ka koetliso eo ba e etsang ho otlala bacha hore ebe baetapele ba kamoso. O re litholoana tsa mosebetsi oa Sesole sa Lesotho (LDF) ke tse latsoehang litabeng tsa ho rupella bacha. Tsena o li hlalositse moketeng oa mokhahlelo oa borobeli oa Lenaneo la LDF la Ntlafatso ea Bacha o bileng, ka la 7 Phupu monongoaha.

O re esale morero ona o ba teng o tsoalla naha namane e nonneng kaha bacha ba bonahala ba hlaboloha, ba qoba litlolo tsa molao le ho ithokhubetsa litabeng tsa boipheliso. A ipiletsa ho batsoali le bahlokomeli ba bana ho alosa boitšoarō ba bona.

A supa ha 'muso o nketse holimo bacha kaha e le bona baetapele ba kajeno le kamoso ka hona ba lokela ho nka boikarabello ba ho ba holisa ka tsela eo ba tla tseba ho etella naha pele mafapheng a fapakaneng a sechaba.

Molaoli oa Sesole sa Lesotho Lt. Gen. Mojalefa Letsoela, o supile hore kamor'a ho

elelloa bacha ba bangata ba kenang litlolong tsa molao ka sekahla, ba ile ba rera ho tla ka leano la koetliso ho bacha le tla ba thusa ka boikemelo le ho tsoa litabeng tse senyang bokamoso ba bona.

O re ba etsa sena ho fetola bophelo ba bana ba Basotho le Lesotho nakong ena e thata eo ba ts'oereng ka thata ho ba le Lesotho le lecha le nchafetseng. A re ba bone liqholotso tse tjametseng bacha ka lebaka leo, ba lokela ho nka boikarabello ho ba thusa hore e be banna le basali ba nang le bokamoso.

O lebohile batsoali ka ho tšepela sesole boikarabello ba ho otlala bana ba bona. A hlalosa hore sesole se atlehile ho tšoella bacha bana litsebo le boitšoarō bo tla ba thusa haholo bophelong.

O bile a totobatsa boitlamo ba sesole ba ho tsoelapele ho sebetse le makala a 'muso le mafapha a ikemetseng ho aha baetapele le sechaba sa kamoso, se nang le lerato le tebileng la naha le ho hlompheha seriti sa botho.

Motšehetsi ea ka sehlophong ho hlaha Vodacom Lesotho, e bile e le Mookameli oa Likamano tsa Kantele, Katleho Pefole o hlalositse hore Vodacom

Lesotho e motlotlo ho tšehetsa lenane lena, e tšoarisanu teu le likhoebo tse ling tse ikemetseng. O itse ba thabile hobane bacha bana e le base-



etsi ba kamoso likhoebong tse kang Vodacom Lesotho, 'me ba motlotlo hobane ba tla fihla mesebetsing ba suoehile ba e-na le boitšoarō bo botle.

Lebitsong la Sekolo se Sehlo sa Sechaba (NUL) Mokone 'Musi, o itse ke selemo sa boraro ba ruta bacha ka boikemelo le boetapele har'a tse ling le lerato la naha. O re ba hlokometse hore ho ka ba le kopa-kopano mosebetsing oa bona seo se tla etsa hore le likolo tse kholo li hlahise baithuti ba nang le boitšoarō bo botle le boikemelo.

O re thuto ke ntho ea

bohlokoa e thusang hore batho ba ikutloisise haholo bacha kaha lintho tse ling ba kena ho tsona e se ka boikhetlo. O re ba re ba ts'oere ka matla ho bona bana ba Basotho e le bana ba ithomphang, ba ithatang, ba ratang naha ea habo bona le ho mamela baholo ba bona.

H'a phethela o ipilelitse ho bacha hore ba tsebe hore tsa- maiso le taolo ke lintho tsa bohlokoa kaha ho se motho ea ka etsang lintho a sa natse ba bang kapa a hatikela litokelo tsa mantlha tsa bona.

Lebitsong la Batsoali Moshe Mosaase, o supile hore naha e lokela ho ba le banna le basali ba sebele bao mesebetsi ea bona e pakahatsang naha ea habo bona, lerato le kholo ea eona kahar'a lichaba tse ling. A re koetliso ena e thusa bacha ba Basotho ho ikemela, ho hlompheha le kahar'a machaba 'me ba ka qetella ba kenella kahar'a liqeto tse kholo.

H'a phethela o itse ha bacha ba hola ba ithompha ho tla thusa hore le Naha ea Lesotho e boele e hlomphehe, e ratoe le ke balichaba bao e bang ba ne ba se na ts'epo ho eona.

E mong oa makoloane Dr. Letzadzo Kometsi, o thoholelitse sesole ka koetliso ena kaha e ba thusa ho nena litlolo tsa molao, ba rutiloe boits'oaro, boikarabello, mamelo le lerato la naha. A re lithuto tseo li entse hore ba ikutloe e le bacha ba nang le litoro tse fapakaneng ea pele ba fihla sebakeng sena. Ba kopa tšehetso ho batsoali, bahlokomeli le baholisi ba bona hore e tle e be bacha ba nang le pono e ntle ka bokamoso ba bona.



Marena a tšehetsa Motlotlehi

Nthabeleng Seitlheko

Ofisi ea Lijo le Phepo e nepahetseng (FNCO) e re marena a lokela ho sebetsa ka thata ho anet-sa molaetsa oa litaba tsa

phepo e nepahetseng sechabeng, e le hore sechaba se be le mekhoa ea ho iphepa nako eohle. Tsena li hlahel-tse koetlisong e neng e tšoaretsoe Marena a Sehlooho, ka la 8 Phupu monongoaha.

Ofisiri ea likhokahan-yo ea FNCO 'Mapaballo Lijo, o re ho qala boima-neng hore ngoana a hole ka tsela e nepahetseng, ka hona ho se fumane phepo e nepahetseng ho ama thuto ea ngoana le moruo oa naha kaha

'muso o lokela ho lefella kalafo ea mafu. O itse ha ngoana a phetse hantle ha se ka thata a eang Litsing tsa Bophelo, 'me malapa le 'muso ha ba lahleheloe ke letho.

Lebitsong la Letona Ofising ea Tona-Khoho Mohlomphehi Richard Ramoetsi, o supile hore ba lokela ho sebetsa ka thata ho khothaletsa Basotho ho phela hantle, ho ja litsoa-mobung le ho bona hore ba sebelisa mobu ho iphepa.

A re marena a loke-la ho fana ka molaetsa khafetsa ho sechaba ho loanela bophelo bo botle le phepo e nepahetseng metseng molemong oa sechaba se utloisisang ka bohlokoa ba phepo. O re e bang marena a ka kenya letsoho ka matla litabeng tsena sechaba kahar'a metse se tse-ba ho itlhokomela le ho

ntšetsapele thomo ea Motlotlehi Letsie III ea ho bona hore linaha tsa Afrika li'a iphepa.

Morena oa Sehlooho oa Leribe Joel Motšoeni, o re litaba tsena li bohlokoa kaha Motlotlehi a filoe thomo ke linaha tsa Afrika ea ho bona hore litaba tsa phepo e nepahetseng li'a phethahala. O re seo Motlotlehi a ke ke a se fihlela a le mong empa 'moho le bona a ka tseba ho ipabola.

A ipiletsa ho marena ho phamolele litaba tse-na holimo hore ba tle ba fihlele katleho ea tsona. A re 'muso o batalatse mabala hore Basotho ba tle ba nolofaloe ke ho etsa mosebetsi. A re ba tseba bohloki ba Basotho ka lebaka leo ba lokela ho tsoarana ka matsoho le bohle ho loantša tlala le bofuma.



Taolo ea mofuthu

Phupu ke e 'ngoe ea likhoeli tse batang haholo karolong ena ea lefatše ka nako ena selemong, 'me Lesotho joalokaha e le eona naha e lutseng tlhorong hofeta linaha tsohle mona Afrika e Boroa, ke eona naha eo baahi ba eona ba tse-bang hantle hore ha ho buoa ka likharata tse tlaase tsa mohatsela ho buuoa ka'ng. Ke matsatsing ana hee ao likotsi tse ngata tsa ho cha li hlahelang baahi.

Ka hona Litsi tsa Kokelo li tla sebetsana haholo le ho oka bakuli ba cheleng, empa qholotso e kholo kea ho cha ha bana kaha ba qeta nako e ngata ba batlana le mofuthu hobane likolo li koetsoe. Batsoali ha re lekeng ka matla ho lemosa bana ka kotsi e ka bakoang ke mollo hle, etsoe Mosotho a re boipaballo bo molemo ho feta setlhare.

Ho bata haholo ka likhoeli tsena selemong hoo batho ba nkang methati efe kapa efe hore ba iphumane ba futhumetse. E, ho monate ho futhum-

ala, empa re lokela ho ba hlokolosi haholo ha re nka likhato tsa ho futhumatsa matlo a rona. Re qobeng ho sia mollo o sa alosa, ho besa ka lintho tse ka bang kotsi haholo ka mokhoa oa ho ama phefumoloho joaloka likatana, lipolasitiki kapa libotlolo le mabili a likoloi joalo-joalo.

Hape re qobeng ho khaleha ho ntse ho besitsoe mollo ekaba masha-la, liqo, lisu, parafini kapa motlakase. Hantle-ntle mollo o hloka ho besoa sebakeng se bulehileng, moo moea o potolohang. Hang ha morero oa ho khaleha o se o re fihletsoe, ha re timeng mollo ho qoba likotsi tse ka hlahang ha re se re khalehile. Menyetla ea likotsi tse ka hlahang ke ho cha ha ntlo 'me batho ba angoa ke mollo kapa moea o hloekileng(oxygen) bakeng sa phefumoloho o ka fela 'me batho ba shoa ba ntse ba robetse.

E 'ngoe e kholo tlokotsi e tlišoang ke mollo ke ho cha ha libaka tsa ts'ebetso. Ha re hopoleng

kamehla hore pele re chaisa lifuthumatsi tsohle li tinngoe, mesebetsing hangata mariha tjena ho tlola mello ka lebaka la ho se ele hloko taba ena. Khotsaletso ho bo-rakhoeboboe ke hore ho be le mosebetsi a le mong eo ka kotloloho e leng ts'ebetso ea hae kamehla hore ho koala mamati ho

tinngoe mollo ka liphaposing tsohle.

Balisana le bona ba lokela ho lula ba fuoa thupelo bonyane leha e ka ba hang ka selemo, ba chorisoa ho hlokome-la makhulo khahlanong le hlaha e ka hlahang neng kapa neng haholo ha e le mariha tjena hobane joang bo omme

'me bo ka cha habobebe. Ha lekhulo le cha, thepa e cha kapa batho ba cha naha e lahleheloe ke moruo litabeng tsena kaofela. 'Me ho matleng a Mosotho e mong le e mong ho sireletsa moruo oa naha ka ho hlokome-la tšebeliso ea mollo hobane o bohlokoa ebile o kotsi.

Likhomo! Puseletso Moeti Mother's Touch



Bacha keletso ke eo

Nthabeleng Seitheko

Seabata Ramabele oa Rothe, Maseru, o re bacha ba lokela ho kena temong ho hlola liqholotso tse tlišoang ke bofuma le tlhokahalo ea mesebetsi ho sa natsoe boleng le boemo ba bona ba lichelete. Tsenali boletse puisanong le Koranta ka la 8 Phupu monongoaha.

O re o qalile temo ea meroho ka selemo sa 2021 ha qeta ho phethela lithuto tsa hae Sekolong se Phahameng, 'me ho

fihlela hona joale o ntse a tsitlaetse ho eona hobane o atleha ho rekiset-sa bahoebi le sechaba. O itse moroho oa hae ha o fele hobane o se a bile a e-na le sebaka seo a se sirelelitseng ho qoba har'a tse ling ts'enyoe e bakoang ke lipula, meea e mengata le komello ka lebaka la maemo a phetoho ea leholimo.

O re leetong lena o ts'ehelitsoe haholo ke batsoali ba hae hape o boetse o tsetse leruong la likolobe. O supile ho se bonolo ho kena leetong la temo empa ho hloka hlaho mocha ea ipoleletseng ho fetola bophelo ba hae, ho



sa natsoe liqholotso.

Ho bacha ba e-s'o kene temong, o ba khothaletsa

ho qala ka seo ba nang le sona le mobu o teng, ba se ke ba nahana lintho tse khohobane chelete eo ea temo eo e tla fetola bophelo ba bona.

Rethabile Mathola ho hlaha Sekolong sa Temo, o re bacha ba lokela ho ba le seabo temong ho kenya letsoho kholisong ea moruo oa naha kaha temo e le mokokotlo oa moruo. A re ba lokela ho ela hloko bohlokoa ba temo kaha mesebetsi e ka fenngoa ke bacha, 'me joalokaha e le karolo e khohobane ea sechaba ba tlameha ho kenya letsoho toants'ong ea bofuma.

O re bana le morero oa ho potoloha libakeng tse

fapakaneng le ho bokella bacha ka mekhahlelo e fapakaneng ea bona ho ba thakela ka malebela litabeng tsa temo. O ipilelitse ho bacha ho ithukhabetse temong molemong oa ho hlahisa mesebetsi.

Lebitsong la Lekala la Temo, Kanetso ea Lijo le Phepo e nepahetseng Rethabile Khatibe, o supile hore lekala la habo le eme ka matla ho bona hore bacha ba fumana ts'ehetso lihlahisoeng tsa bona tsa temo. A re hore bacha ba seke ba nyahama litabeng tsa temo ba ba thakela ka malebela ho ba ntlafatsa le ho ba bonts'a menyetla e teng kahar'a temo.



FARMERS PITSO AWARDS 2024



HALALA! HALALA! HALALA! OA LALA OA SAAALA!

FAMERS PITSO AWARDS – a platform for celebrating individuals' or organizations achievements in agriculture, are back on the 6th and 7th September 2024 at the Manthabiseng Convention Centre in Maseru. Nominations are open. The aim is to shine a light on phenomenal work across the industry, recognise, and honour Basotho farmers with outstanding contributions to the agricultural sector. (See our Facebook page-Farmers Pitso for details on how to enter or nominate someone/oneself).

BESP e tlosa bana malapeng



etsa mesebetsi ea nakoa-na, hobane mosebetsi o ile oa fela.

O re ho fihlela hona joale ngoana oa hae o kena sekolo ka tsela e khotsofatsang le ho sebetsa hantle sekolong. O re pejana o ne a thusoa ka seaparo sa sekolo ke baithuti ba phethetseng lihlopha tsa bona mafelo a selemo, ka nako tse ling o ne a nyahama hobane a bona a sa tsoane le bana ba bang.

O re o ne a se na seo a se aparang, ka hona chelete ena e mo imolotse le ho inola ngoana oa hae maqakabetsing ao a neng a tobane le ona, ke takatso ea hae hore lithuso li be teng hobane ngoan'a hae h'a ithepellise.

Ho batsoali ba bang ba ka ratang ho fua tšehetso ena, o itse ba khotlaetse bana ho kena likolo, ba ba tšehetse ba tsebe ho utloisisa bohlokoa ba thuto. A re ho bohlokoa hore ba tsamaee ka taelo eo ba e filoeng. A qetella ka ho leboha mofani ka tšehetso ena kaha e mo imolotse.

Phethetsi Makhabane, Qaqatu, Ha Rachabana, o re chelete ena e fumane seaparo sa sekolo sa ngoana se se na chebahalo. A leboha 'muso hobane o ne a qakehile hobane mokhoa oa hae oa boipheliso ke ho rekisa linku, ho lema linoa, mabele le koro, 'me o lula le bana ba bararo.

O re ha lithuso tsena li fela o tla 'ne a tsoelepele ka ho rekisa hore bana ba khutlele sekolong, hobane o batla ba kene sekolo hore ba tle ba tsebe ho iphelisa.

Morena Tšelisiso Theko, oa Ha Theko, o tiisitse hore ho na le bana ba thusoang ke Lekala la Tekano, Bacha le Ntšetsopele ea Sechaba

ka litsiane motseng oa hae, ka chelete ea seaparo sa sekolo. O re morero ona o entse hore bana ba khutlele likolong haholo bao batsoali ba bona ba se nang bokhoni.

A ipiletsa ho sechaba sa habo ho tšepahalla chelete ena, ka ho etsa mesebetsi eo e e reretsoeng, ka hoo o motlotlo hobane e fetotse bophelo ba bana ba phelang tikolohong ena. A re Basotho ba hloka thuso, ka lebaka leo o leboha mofani ka tlatsetso ena, e se eka ho ka thusoa le batho ba bang.

Ofisiri e Kholo ea Lihlapi-

no ea litsiane literekeng tse ling. A re ba ntse ba shebile bana ba bang, ba nang le bohloki bo itseng empa seo se tla laoloa ke boikeletso ba lekala kamor'a ho etsa boithuto literekeng.

O itse ba shebile haholo likansele tse ka maloting, 'me kamora ho fa batsoali litsiane ba etsa tšalo morao. A re sekolo se kenya letsoho ka ho lokisetša bana moo e bang bana ba fumanana seaparo sekolong, ebe mosebetsi oa batsoali ke ho lefella litlhoko tsa ngoana. A re karolong eo ba sa fumanang lenane leo ba le hlokang ba tla sebelisa me-



so tsa Bana ba Likhutsana le ba tlokotsing Likolong tse Mahareng le tse Phahameng, Lekaleng la Tekano, Bacha le Ntšetsopele ea Sechaba, Maseru, Liteboho Letsie, o itse morero o moholo oa BESP ke ho khutlisetsa bana kahar'a likolo kaha ba ile ba hlokomela hore baithuti ba fumanang litsiane tsa bana ba tlokotsing ba ne ba tsoa sekolo ka lipalo tse holimo, 'me morero ke hore ba rekeloe seaparo sa sekolo hore baithuti bao ba qetelle ba tsoana le bana ba bang.

O re ba hloka ho qala le ngoana ho tloha sehlopheng sa borobeli ho isa ho sa ho qetela. A bontša qholotso e kholo e ne e le tlhokahalo ea lieta ho baithuti ba ka maloting, leha ho le joalo malapa a bonahala a ntse a se na kutloisiso ka litaba tsa chelete ena.

A re ba shebile ho fihlela palo ea baithuti ba 15,000 naha ka bophara, 'me ha joale ba se ba fihletse ba 6, 000 ka hona palo ena e lebeletsoe ho nyoloha kamor'a hore ba phethele pha-

khoa ea lekala ea ho khetha bana, le hore bana ba be teng kahare ho sekolo.

A re ke hona ba tla fana ka thuto ho marena le makanselara kaha ba bile morao haholo, 'me ba se ba e-na le lihlopha tse fapaneng tse sebetsanang le boiketlo ba bana. A re ho fihlela ha joale o se a tsamaile litereke tse peli ka hoo o utloa a thabile hore ebe e le BESP ba fane ka chelete ena, nakong ea Mariha 'me bana ba tla khutlela sekolong ba tsoana le ba bang.



Nthabeleng Seitlheko

Ele ho arabela lipehelo tsa ngoana-kholo (SDGs) litabeng tsa thuto Lekala la Thuto le Koetliso ka tšebeliso 'moho le Lekala la Tekano, Bacha le Ntšetsopele ea Sechaba, ka tšehetso ea lichelete ea Banka ea Lefatše li kahar'a letšolo la ho fana ka chelete ea tlatsetso ea seaparo sa sekolo ho baithuti ba sehlopha sa borobeli, borobong le Leshome, ba kahar'a sesiu sa lihlapiso tsa Lekala la Tekano, Bacha le Ntšetsopele ea Sechaba. Letšolo lena le tsoetsepele Literekeng tsa Mafeteng, Mohale's Hoek le Quthing, ka la 10 Phupu monongoaha.

Lekala la Thuto le Koetliso kamora ho hlokomela ho theoha ha lipalo tsa baithuti

Likolong tse Phahameng, morero ke ho bona hore bana bohle ba fumana thuto ea boleng ebile e le tokelo ea bona 'me bohle bana ba neng ba le malapeng ba sa kene sekolo ba khutlele sekolo. Ho atlehisa taba ena, Lekala le fana ka chelete ea tlatsetso ea seaparo sa sekolo ho baithuti ba nang le bohloki bo joalo, haholo ba kahare ho sesiu sa bana ba phelang kahar'a malapa a tlokotsing.

'Mankaiseng Theko oa Mapotu, Ha Ramohapi, Mafeteng, o supile hore ngoan'a hae o etsa sehlopha sa borobong Sekolong se Phahameng sa Makintane. O re o atlehile ho rekela ngoana litlhoko tsohle tsa sekolo kamor'a ho fumana chelete e kaalo ka M1,500.00 ea tlatsetso ea seaparo sa sekolo. O re kaha molekane oa hae a ile a hloka hlahala selemong sa 2022, o holisa bana ka ho






MOB KIDDS

EDUTAINMENT

TLOTLONTSOE



Across

- 1 Seletsoa sa Basotho se entsoeng ka lehlaka le khoele. (5)
- 5 Mekhabo le metako e ngoloang leboteng la seotloana ke bo-'m'e.(6)
- 8 Sebetsa sa banna se entsoeng ka thupa mme se na le kotofa hloohong.(4)
- 11 Tholoana e bopehileng joalo ka mabele, e mela sefateng, e tholahala ka mebala o mofubelu le o mosehla. (10)
- 13 Nkho e tšelang metsi e entsoeng ka letsopa.(4)
- 16 Pina e binoang ke banna ka likolu ba binela fatše. (9)
- 17 Motoho o thata o phehoang ha ho etsoa joala. (6)
- 18 Papa e entsoeng ka hlama ea motoho oa mabele. (4)
- 20 Motjeko oa bo-'m'e le banana moo ba khabang ka ho tsamaisa mahetla (7)
- 22 Lebitso le leng le bolelang molamu (6)
- 23 'M'e oa Napo (6)
- 25 Moroho oa lihaba tsa mokopu o kopantsoeng le mabolotsana.(4)
- 26 Lejoe le sebelisoang ho sila holima leloala. (8)

Down

- 1 Lero la moroho o phehiloeng o nang le metsi. (6)
- 2 Kobo e entsoeng ka mokotla 'me e aparoa ke bashemane thabeng.(8)
- 3 Lebitso le leng la mokorotlo (10)
- 4 Sejana sa joang se khakeletsang lijo tse siloang (7)
- 6 Sesebelisoa sa ho noella metsi kapa joala se entsoeng ka khaketla ea tjoto. (6)
- 7 Lero la nama e phehiloeng. (4)
- 9 Nkho e noellang joala 'me e entsoe ka letsopa. (9)
- 10 Sebetsa se motsu se entsoeng ka thupa le ka tšepe. (6)
- 12 Papali e bapaloang ke banana ba matsoele a emeng ho rapella pula
- 13 Sesebelisoa sa joang se tšelang lijo tse bolokiloeng. (6)
- 14 Ntlo ena e ka bitsoa mohlangoa fatše (7)
- 15 Sebetsa sa ho tsoma linyamatsana (5)
- 19 Lero la mokopu o phehiloeng ka metsi. (5)
- 21 Sesebelisoa se pepang bana ba masea.Se entsoe ka letlalo la nyamatsana.(5)
- 24 Seletsoa se entsoeng ka lesapo. (5)

Namane o'a ipabola

O boetse a bontša hore o batla ho ba mohlala o motle ho banana ba bang ka ho tliša phetoho bophelong ba

Tšeliso Thakholi

Khalala ea Sehlopha sa Bolo ea Maoto sa Kick4Life Ladies, e bile e le sebakali sa Sehlopha sa Naha sa Mehalalitoe, Reitumetse Namane o re lerato, tšebetso, tšebelisano 'moho le ho sebetsa ka boitelo ke tsona tse mo tlišelitseng katleho e kholo ea ho ba sebakali se ipabotseng ka papali ea sona e tsoileng matsoho, selemong sa lipapali sa 2023/2024.

Namane ea bapalang letsohong le letona sehlopheng sa habo sa Kick4Life Ladies o khethiloe e le eena ea ipabotseng Liking e Kholo ea Basali ea WSL kamor'a ho hlola libapali tsohle tsa liki tseo a neng a qothisana lehlokoa le tsona ho tseka maemo ana.

Puisanong le Koranta kamor'a tšebetso ea hae e ntle eo a entseng selemong se fetileng sa lipapali, o bontšitse thabo le teboho ea hae ho batsoali, bakoetlisi le libapali 'moho le eena ka tšebetso e matla haholo



eo ba mo fileng eona. "Ke ikutloa ke le motlotlo haholo ebile ke hlokometse hore ho sebetsa ka thata ho tliša katleho." A rialo.

A supa hore ho sebet-sa ka thata ha oa tlišetsa eena feela katleho, empa le sehlopha sa habo kaha se phethetse liki ena sentse se le boemong boo se

tloaetseng ho ba ho bona, e leng ba bobeli. A re tekatso ea hae ke hore isao ha liki e fela Kick4Life ebe e le eona bompoli.

A bontša hore ho tloha h'a qala ho bapala bolo ea maoto, toro ea hae haesale e le ho ipona a bapalla Kick4Life e le hore a tle a tsebe ho iphumana a le sehlopheng sa

Naha sa Mehalalitoe. "Toro eo ea ka e phethahetse, 'me ke lakatsa ho iphumana ka letsatsi le leng ke tšoana le Queen Rabale ke bapala kante ho naha. Sena se tla thusa sehlopha sa heso sa Kick4Life le Mehalalitsoe hore li hole ka litsebo tseo ke tla beng ke e-na le tsona." O boletse joalo.

bona. A ipiletsa ho bacha ho mamela, ho ba le boitšoaro bo bottle le ho hlompaha batsoali ba bona e le hore ba tle ba tsebe ho atleha ka litalenta tsa bona. "Qobang metsoalle e kotsi rapelang le ho ts'epa matla a Morena Molimo nthong e 'ngoe le e 'ngoe eo le e etsang." Ke Namane eo.

E roalla le sa sele

Tšeliso Thakholi

Sehlopha sa Bolo ea Maoto sa Linare monongoaha, se malala-a-laot-

soe ka ho tla ruta lihlopha tse kholo motloang oa pula, ka ho tekena karolo e 'ngoe ea libapali tse 'ne, tse nang le boiphihlelo papaling ea bolo ea maoto e le boitukiso le ho matlafatsa se-

hlopha bakeng sa lipapali tsa Liki e Kholo tsa selemo se secha sa lipapali sa 2024/2025. Tsena li sibolotsoe ke Raliphatlatso oa sehlopha, 'Matlhohonolofatso 'Kony' Lebesa puisanong

le Koranta ka la 7 Phupu monongoaha.

H'a tšetleha litaba tsa hae, o supile hore ba tekenne Pheko 'Molaoa ea bapalang e le Defensive midfielder ea neng a se a sena sehlopha seo a se bapallang. A re ba boetse ba pitlile tlhapi e kholo kahar'a libapali tsena, e leng mohlaba-lintlha ea hloahloa Hlomelang Lebina ho tsoa sehlopheng sa Matlama. Athe sebakali se seng ke Seleka Qhobela ea bapalang ka lepheong le letšehali ho tsoa sehlopheng sa Lifofane le Tieho Ntulo ea bapalang centre back ho tsoa sehlopheng sa Lioli.

A hlakisa ka boitšepo bohle ba hae hore kahare ho sehlopha sa Linare ha ho na sebakali se betere ho feta se seng, 'me libapali tsena tse fihlang, ha li tl'o koala likheo tsa ba tsamaileng, empa ba tl'o bapala ka boitelo ho thusa sehlopha ho hapa lipapali tsa sona le ho sebetsa hantle selemong sena se secha.

A re mokoetlisi joaloka selemong se fetileng h'a fihla o ile a bolelloa hore thomo ea hae, ke ho thusa sehlopha ho phahama moo

se neng se le hona teng, e leng maemong a bohlanano ho ea pele. "Re lebeletse ho ipona re le kahare ho Top 4 kapa re nkile liki kapa mehope ea selemo sena. Re ntse re sa sie kampo e nang le boitšoaro, kutloisisano le tšebelisano 'moho e mofuthu." Ke Kony eo.

Ho sa le joalo, libapali tse 'ne tsa Matlama, e leng Jane Thabantšo, Rethabile Mokokoane, Monaheng Ramalefane le Tšepang Ntsenyane ba nchafalitse likonteraka tsa bona ka lilemo tse peli sebakali ka seng. Ho feta mona, Matlama e boetse e ekeletitse bokoetlisi ba Matlama ka konteraka ea selemo, e leng Mokoetlisi Halemakale Mahlaha, Motlatsi oa hae Mosito Matela, Dhloho Monaphathe le mokoetlisi oa lithibathibane Matsoai Shokhoe. Ka holi-mo ho tsohle, Sehlopha sa Naha sa Palancas Negras ea Angola, ke bona bompoli ba bacha ba Mohope oa COSAFA kamor'a ho pola Namibia 5-0, lipapaling tsa mokhaola-khang tse bileng Lebaleng la Nelsong Mandela Bay, Afrika Boroa ka la 7 Phupu monongoaha.



O hapa tlholisano

bane Khoabane, bobeling ea e-ba Junior Ethan Rasephei le Hlengiwe Phera ka tatellano ea bona.

Tšeliso Thakholi

Sebapali se tum-meng haholo sa papali ea Chess, Tshepe Lebajoa ebile mpoli ea litlholisano tsa Mariha tsa Papali ea Chess, mokhahlelong oa ba baholo ka ho banna, ha ka ho basali ebile Lintle Molise. Litlholisano tsena li ne li tšoaretswe Lancers Inn, Maseru ka la 6 ho isa la 7 Phupu monongoaha.

Har'a libapali tseo Tshepe a li hlotseng litlholisanong tsena, ke mpoli ea ngoahola e neng e sireletsa Mohope e leng Bokang Motsamai ea qeteletseng a sa atleha ho o sireletsa. O boetse a hlo-la qhoku e nang le boiphihlelo papaling ena, e leng Morena Joang Molapo ka ho hapa lipapali tse hlano a bapala ka ho lekana ho e le 'ngoe.

Tlholisano ena e ne e kenetsoe ke libapali tse tšeletseng tsa mokhethoa oa naha, e le ho matlafatsa boitokisetso ba bona bakeng sa litlholisano tsa Machaba tsa 2024 Chess Olympiad tse tlang ho tšoareloa Naheng ea Hungary ka la 10 Loetse 2024.

Khalala ena ea papali ea Chess, o boleletse Koranta hore o ikutloa a le motlotlo haholo hore ebe ke eena mohloli, le hoja hae mona e se e batla e le tloaelo ho hapa litlholisano. O re o qalile ho kenela litlholisano tsa Chess h'a le Sekong se Phahameng ka selemo sa 2018. "E le ha ke qala ho bapala Chess ka matla a maholo." A rialo.

O re o ile a tsoelapele ho bapala papali ena ho fihlela a se a emela naha litlholisanong tse kantle ho naha. A tiisa hore lekunutu la hae le lehlo la ho lula a ipabola, ke ho ba le lerato la papali ena. "Na Chess e maling a ka, ke rata papali ena haholo." Ke eena eo a phethela ka ho khothatsa ba bang hore ha ba hlotsoe ba se ke ba nyahama kapa hona ho fela pelo, empa Chess e batla motho ea nang le thahasello le lerato la eona.

Mohloli ka ho bashanyana le banana ba U/14 ebile Batloulung Lesela le 'Makhoa-



Ba hlahlelloa ka malebela

Tšeliso Thakholi

Ele ho holisa le ho matlafatsa papali ea Basketball ka har'a naha, botsamaisi ba papali ea Basketball ka Ofisi ea bona ea Ntlafatso ea Papali ena, bo tsoile letšolo ho hlahella lihlopha tsa U20, ka malebela ao ba tla tseba hore ba utloisise papali ea Basketball, ba e rate le ho ba le thahasello ho eona letsatsi ka leng.

Ho ea ka Motsamaisi oa Ntlafatso ea Papali ea Basketball Tefo Mosala, ba tsoitse bocha Lenane la Koetlisi le hlahang kahare ho tsamaiso ea papali ea Basketball, leo morero oa lona e leng ho otla talenta ea bana ho tloha lilemong tse 15 ho isa ho 20, ka ho ba tšoarela lipapali tsa setsoalle moo ba koetlisoang 'moho. A re boholo ba libapali tse teng koetlisong ke tse hlahang sesiung sa lihlopha tsa Liki e Kholo ea Basketball(NBL), ba neng ba se ba ntse ba bapalla NBL le ba bacha ba qalang ho bapala Basketball.

A bontša hore lenane lena leo ba le khakotseng bocha kamor'a litsekisano tsa matla tse bileng teng kahare ho papali ea Basketball nakong ea ho feta, le tliil'o ba thusa

ho ntlafatsa papali ena, bo-emong bo tlaase e le hore e tle e tsebe ho hola, "etsoe Sesotho se re thupa e otlole e sa le metsi. Ngona e mong le e mong oa lilemo tseno re mo buletse mamati kahare ho papali ea Basketball hore a tle re tli'o mo otla ka ho mo fa litsebo tse pharaletseng tsa papali ena." O boletse joalo.

A supa hore ha ba ntse ba bapala lipapali tsena tsa ho koetlisoa, ba aroloa ho late-la hore na ba se ba e-na le boiphihlelo ba mofuta ofe

kaha ho se ho ntse ho e-na le ba seng ba bapalla liki ea NBL, bao ba bang ba bona ba ileng ba bapala lipapali tsa AUSC Region 5 tse ileng tsa tšoareloa kahare ho naha lilengoaneng tsa ho feta. Athe ba bang bona e hlile ba bacha haholo papaling ena.

A tiisa hore thahasello ea hae ka Ofisi ea Ntlafatso le Kholiso ea Papali ea Basketball ka sesiu seo ba tlang ho ba le sona kamor'a lipapali tsa koetliso, ke ho thusa bakoetlisi ba lihlo-

pha ka ho ba le libapali tse ntlafetseng. A re o motlotlo haholo ho bona hore lenane lena le ntseng le tsoelapele, le bonahala le atlehile haholo kaha libapali li bonahala li tlike ka bongata.

Ho sa le joalo lipapaling tsa mokhahlelo oa bobeli oa koetliso tse bileng Ha Ratjomose, Maseru ka la 5 ho isa la 9 Phupu monongoaha Team 1 e ile ea sasara Team 2 ka 54-30, Team 3 ea tete-ka Team 1 ka 116-16. Athe lipapaling tse ling Team 3 ea hlola Team 1 ka 20-10.



Stress is more self-inflicted



Teboho Matjeka

Most of us at some point or another have been subjected to stress. We have experienced its first-hand effect and impact, surely, we hardly ever want to go through that painful experience again. Unless we know what causes stress we certainly are going to go through it again.

Let us look into why people find themselves stressed, stress is more of what we do to ourselves than what others do to us.

It starts with how we conduct ourselves, we normally act for a reaction, we don't do things because we want them or wish they could happen, we do them because we expect people to react in a certain way. When that doesn't happen, which is often the case, we get depressed, we were acting to impress, to score some points with the people. We want them to have a certain perception of who we are, we would have invested a lot into the action, therefore, it's failure to score us points really frustrates us.

The result is simply the

undesirable stress we detest so much. As if that is not enough, we go into relationships with uncommunicated expectations, we have a feeling that, because they said they love us they should automatically know what we want or how we want to be loved. When some or all those expectations are not met we lose it, we think we aren't meant for relationships but in reality had we communicated things would have been different. It is important therefore, to take care of our hearts and avoid entrusting others with their well-being.

ELEGANCE COUTURE



FABRIC THAT SPEAKS

ELEGANCE COUTURE

CONGRATULATES ALL GRADUANDS OF 2024.
MAY GOD SHINE HIS LIGHT UPON YOUR WAYS
AND POUR HIS BLESSINGS UPON YOU ALL.
REMEMBER TO GET YOUR FULL GRADUATION
REGALIA FROM IS AS WELL AS YOUR DESIRED
OUTFIT AT LOW PRICES.

50% OFF

UNTIL AUGUST 2024

(ALL COLLECTIONS)



PHYSICAL ADDRESS:
TRADORETTE BUILDING ROOM B22

WHATSAPP: +266 58524642
FACEBOOK AS ELEGANCE COUTURE
INSTAGRAM AS ELEGANCE COUTURE

